



UIT DIE PEN

Hier sit ons nog steeds in die inperking. Weliswaar vlak 2. Al wat ons effens opgewonde maak is die fopnuus dat oom Cyril gaan aankondig dat tannie Kopdoek besluit het dat die drankwinkels moet toemaak. Dan is daar chaos, want almal storm vir 'n laaste botteltjie iets. Stry: dit was 'n skitterende verkoopstruik. Die mense hier in onse stad het in rye gestaan om gemeet en geweeg te word voordat hulle dit in die drankwinkels kon waag.

Lekker het ek in my mou gelag. Veral omdat ek klaar my vyf bottels rooiwijn die vorige dag gaan koop het.

Gepraat van oor Cyril: ek haal my pluiskiel vir hom af. Wat sommige gedink het is die einde van die Ramp-maphosa het toe in 'n Rama-fees-a geëindig toe hy hierdie naweek aangekondig het dat hy eerste in die ry staan om ondersoek te word vir finansiële ongerymdhede. Om die voorbeeld te stel. Ek sal ook my pluiskiel in die wind wuif omdat hy kommentaar gelewer het oor die brief wat Zuma aan hom geskryf het in reaksie op Zuma se brief aan die Firma oor die k-woord. Korrupsie.

Op <https://www.iol.co.za/> lees ek sy reaksie: "I receive many letters as the president of the ANC and this letter is one of those. So, I have not responded. Obviously, the letter is being debated and being talked about. I don't even know what the reasoning for the letter was and I will not even publicly entertain issues that are raised in the letter."

En daarmee vee hy die agbare vorige president van die tafel af. Brilljant, dink ek.

Tans het ek net een wens: Kan ons asseblief hierdie jaar *fast forward* om verby hierdie nare tydperk te kom? Ek kan nie meer nie. Kom ons sit 'n grafsteen hierop en gaan aan met ons lewens.

Ongelukkig is dit nie so maklik nie.

Gepraat van grafstene.

So vyf jaar gelede maak ek vir myself 'n wenslys vir die jaar 2016. Ek wou vyf dinge doen, maar slaat my met 'n pap snoek, ek kan nie meer al vyf die goeters onthou nie, net drie daarvan.

Ek wou een aand op 'n matras buitekant onder die sterre slaap.

Dit het ons probeer. Die aand ewe formeel die dubbelbedmatras uitgedra en op die gras gaan lê.

Duvet, kussings en al. Ek, wat nie 'n happy camper is nie, het gou-gou aan die slaap geraak.

Totdat my goeie man met 'n gejuig wakker geword het. Die muskiete dra hom weg, kan ons nie asseblief maar in die huis gaan slaap nie?

Ja, wel, so dra ons weer die dubbelbedmatras, ewe plegtig, terug kamer toe.

Ek wou hand-aan-hand met my goeie man deur 'n onbekende dorp stap. Ons het die geleentheid gekry, weliswaar omtrent ses maande nadat ek my wenslys bekend gemaak het. Ons het deur Nieu-Bethesda gery, langs 'n leivoor parkeer en tot by die Uilhuis gestap. Hand-aan-hand.

Ek wou 'n blommetjie op 'n vreemde mens se grafsteen gaan

sit. Ek en my goeie man het een Sondagmiddag, met 'n arm vol tuinblomme, na ons dorpie se begraafplaas gestap. Ons het deur die rye en rye marmer en graniet geloop en blommetjies op onbekendes se grafstene gesit. Ek sien die ou kleintjies, sommige net 'n paar dae oud, wat klein grafsteentjies met 'n engeltjie op het. Dan is daar diegene wat net 'n klipkruis op het. Ander het groteske en majestueuse gedoentes wat hulle laaste lêplekkie merk. 'n Marmerbeeld wat tot doer bo strek laat my dink aan die mense by die toring van Babel.

Wat op aarde besiel jou om so 'n monstrositeit op te rig? Dalk 'n skuldige gewete?

Ek wonder wat gaan fout in jou kop as jou "kopsteen", soos ouma Cielie dit genoem het, meen dat Mev. Dr. Du Preez hier lê. Of Mev. Ds. Botha. Wie het die titel hier gekry? En as die titelryer (as ek haar so mag noem) die dag dood neerslaan, sal sy dan Oorle Mev. Dr. Du Preez wees of Mev. Oorle Dr. Du Preez? Dit kan nogal 'n tameletjie word.

Hierdie het my aan twee begraafplaas-stories laat dink.

My tannie Ous het reeds vir haar en haar man grafte gekoop, so skuins oorkant hulle seun se graf. Dié is toe alreeds jare lank dood. Tannie Ous het die ewige velallergieë gehad. Vir skottelgoedseep en wasgoedseep en handerom en naellakverwyderaar. En ook vir Seringboombloemmetjies. Daardie donserige goeters wat die Seringbome dra.

So gaan sit tannie Ous een dag blomme op haar seun se graf en sien dat daar 'n Seringboom tussen hulle grafte opkom. Sy draai net daar op haar hakke om en gaan gee die grafte van haar en haar man terug aan die munisipaliteit, want sy is vreeslik allergies vir Seringbome. Sy sal mos nou nooit daar kan lê wanneer sy die dag

WEEK DRIE-EN-TWINTIG

ingespit is nie.

Ironies is dat tannie Ous nooit begrawe nie, net veras.

Ieder geval. Toe my rooikopsussie haar grafsteen kry, moes die hele familie opsluit begraafplaas toe gaan om dit te gaan gadeslaan.

My ma verduidelik aan haar kleinkinders dat die munisipaliteite nie meer so lekker kan korrel nie, want hulle grou die grafte met 'n *backactor* (jammer, Google Translate reken dat *backactor* 'n agterste akteur is in Afrikaans) en die operateur steur hom nie aan rye nie.

Aan die einde van Rooikopsussie se ry grafte loop dit windskeef, die twee rye wat veronderstel was om parallel te wees, vloei sommer in mekaar. Die laaste graf in die ry was vir die Zeelies. Die oom was reeds dood en begrawe, maar die tannie het op daardie stadium nog geleef. Die gesprek tussen my ma en haar kleinseun klink toe as volg:

"Krappe se vrou sal nooit in daai graf in kom nie, dis heeltemal te klein."

"Maar ouma, wat is die probleem? Sy kan mos maar net gou kom vir 'n *fitting* en kyk of sy inpas."

Ek het al lekker langs Rooikopsussie se graf gestaan en huil, maar ons het net so lekker staan en lag oor die wysheid van die kleinseuns.

Dis hoekom hulle sê: *Hire a teenager while he knows everything.*

DIE RUS INGE GAAN

† In liefdevolle herinnering aan **Linah Neuwe**

Mohapelo, oorlede op 3 Augustus 2020 in die ouderdom van 28. Die begrafnis het plaasgevind op 25 Augustus 2020 in Frankfort Begraafplaas. Sy laat na haar familie en vriende.

† In liefdevolle herinnering aan **Banti Berlina Rameno**, oorlede op 22 Augustus 2020 in die ouderdom van 88. Die

begrafnis het plaasgevind op 29 Augustus 2020 in Phiritona Begraafplaas. Sy laat na haar familie en vriende.

† In liefdevolle herinnering aan **Martha Mamokete Mofokeng**, oorlede op 26 Augustus 2020 in die ouderdom van 55. Die begrafnis het plaasgevind op 2 September 2020 in die Plaas Begraafplaas. Sy laat na haar familie en vriende.



BOKAMOSO BLESSING MPEMBE MISSING

A baby girl, only 21 months old, was kidnapped by known suspect on 30 August 2020 at 23:30 from her home in Petrus Steyn. She was wearing a red jersey, pink tracksuit trousers and pink and white socks when she was kidnapped. She has brown eyes and black hair with a small body build. If you have any information please call the Investigating Officer Captain Mbele at 082 336 7760 or Crime Stop at 08600 10111 (24/7) or report on the MYSAPS mobile app.